

Pidipenteidi **inänite Pabodo nänö cadota ante** **yewæmongainta**

Waa quëwëedäni, ante

¹ Itota Codito ingante në cæmōna inte botō tönō Tımoteo guëa apænemōna ininque botō Pabodobo adoboque yewæmōmopa. Minitō Pidipoto iñōmō quëwëninque Wængonguï quimīni inōmīni inte Itota Codito nempo në quëwëmīni iñōmīnite botō, Acæmīnimpa, ante yewæmōmopa. Mīni pōnencabo beyænque ante pancamīniya në aamīni iñōmīnite pancamīniya guiquënë në cæmīni iñōmīnite pancamīniya guiquënë önōmīnique iñōmīnite botō edæ, Tōmāmīni edæ acæmīnimpa, ante yewæmōmopa. ² Mönō Mæmpo Wængonguï mönō Awënë Itota Codito tönō waadete pönō cæda ate gänë pönëninque waa quëwëedäni, ämopa.

Në pönēmīni beyæ Wængonguï ingante
apænebopa, ante

³ Æyedēmë mīnitō imīnite ante pönëmo inte botō Wængonguï ingante waa ate pönëninque apænebopa. ⁴ İninque mīnitō beyæ ante Wængonguï ingante wantæ iñō wantæ iñō apænedinque botō, Waa quëwëmīnīpa, ante watapæ tođinque apænebopa. ⁵ Edæ, Botō tāno goyedë mīnitō godongāmæ cæmīnitapa. Ayæ, Mönō Codito ingantedō ante mīnitō ñōwo ganca godōmenque watapæ apænemīnīpa,

ante pönëninque botö, Wængongui bitö pönö cæbi ate pidipenteidi waa cædänipa, ante apænebopa. ⁶ Minitö botö ayömo tæiyæ waëmö entawencæminimpa, ante nê mä badongaingä inongä inte Wængongui ñöwo Itota Codito nänö ponguinganca godömenque pönö badöninque cöwê inque badongä ate minitö ædæmö pæimîni bacæminimpa. Mänömaï impa, ante botö, Nawangä impa, ante do eñëmopa.

⁷ Mönö Codito ingantedö ante watapæ möni eñëninö ante botö wææ äninque, Nawangä impa, ante apænebopa. Mänîne botö apænede beyænque pancayedëña botö imote tee mönedäni wæbopa. Incæte tee mönedäni wæbo incæ, Nawangä impa, ante wææ ämo incæ Wængongui nänö waadete pönö cægäinö ante ænte entawëñömo minitö adobaï mäninö ante æninque botö tönö godongämæ entawëminipa. Ìninque, Mönö mäninö ante äanque baï entawëmö imopa, ante minitö imînite waadete pönëninque botö, Minitö ædæmö pæimîni bacæminimpa, ante nöingä cæte pönëmopa.

⁸ Itota Codito mönö imonte nanguï waadete pönengantawo. Edæ tömengä waadete nänö pönënö ante entawëninque botö minitö imînite waadete pönëmopa, ante adinque Wængongui incæ, Pabodo nawangä minitö imînite nanguï waadete pönengampa, ante apænebaingampa.

⁹ Ìninque minitö beyæ ante botö Wængongui ingante iïmaï ante apænebopa. Mîni waadete pönencabo iñömînite Wængongui pönö cæcä ate godömenque waadete pönencæminimpa. Ayæ waadete pönëmîni inte minitö, Quinö wënæ wënæ

ī, Quīnō waa ī, ante edonque adinque nō apænte
 āmīni bacæmīnimpa. ¹⁰ Mōnō æbānō cæte waa
 quēwenguī, ante edonque adinque mīnitō Ao ante
 waa quēwēninque Itota Codito nānō ponguinganca
 wentamō mongænāmaī inte tee tēwadāmaī īmīni
 incæmīnimpa. ¹¹ Ayæ Itota Codito pōnō cæcā
 ate mīnitō nō cædinque waa quēwēmīni adinque
 wadāni Wængonguī ingante waa ate pōnēninque
 apæncædānimpa, ante botō Wængonguī ingante
 apænebopa. Ayæ mīnitō mānōmaī inte waa
 cæmīni adinque tōmānāni wæætē Wængonguī
 ingante apænedinque, Wængonguī ēñēmi. Bitō
 ñāō baī ēmōnōmi inte waa pōnī cæbipa, ante
 apæncædānimpa, ante cædinque botō mīnitō beyæ
 ante Wængonguī ingante apænebopa.

Pabodo, Codito beyænque quēwēmopa, angampa

¹² Īñānāni apænebo ēñēdāni. Mānōmaī
 cædāni botō wædō incæ wīī ōnonque cætimpā.
 Wæætē, Codito beyænque Pabodo caate wæcampa,
 ante adinque wadāni godōmenque nanguī
 ināni Codito ingantedō ante watapæ mōni
 apænedō ēñēninque wede pōnēnāni badānipa.
¹³ Edæ, Codito ēmōwo apæncā beyænque
 Pabodo ingante tee mōnedānipa, ante tededāni
 ēñēninque odōmāno tæiyæ awēnē oncō wææ
 wānōnāni incæ wadāni wayōmō quēwēnāni incæ
 tōmānāni do ēñēnānipa. ¹⁴ Mōnō Awēnē nempo
 quēwēnāni incæ, Pabodo tee mōnete wæcampa,
 ante wædinque wodo tōmānāni godōmenque wede
 pōnente badānipa. Īninque wede pōnēninque tæī
 piñænte entawēninque tōmēnāni guīñēnāmaī inte

Wængonguī nānō apænedō ante godömenque apænedānipa.

¹⁵ Pancadāniya, Pabodo miñæ godömenque nanguī ināni godānipa, ante pönō piinte adinque Codito emōwo ante apænedāni incæte botō imote guëadō guëa piincæte ante apænedānipa. Mänömaï i incæte wadāni guiquënë, Pabodo tönō mönō godongāmæ cæcæimpa, ante gänë pönëninque Codito emōwo ante apænedānipa. ¹⁶ Në gänë pönente apænedāni guiquënë, Codito ingantedō ante watapæ mini eñëninō ante Pabodo wææ ancæcäimpa, ante botō imote godō gö cæcampa, ante do eñënanipa. Ìninqe tömënanī botō imote waadete pönëninque apænedānipa. ¹⁷ Në wæætedō wæætë tededāni guiquënë, Pabodo tee mönete wæyongante mönō apænete tomō wæcä tocæi, ante cædānipa. Tömënanī nāmā beyænque ante cædāni incæte waa cæte bai cædinque Codito emōwo ante apænedānipa. ¹⁸ Incæte pancadāniya nāmā beyænque ante apænedāni incæ pancadāniya nō pönente apænedāni incæ mänināni tömānāni Codito nānō cægainō ante nāwangā ante do edæ apænedānipa. Mänömaï impa, ante pönëninque botō watapæ tobopa.

Ayæ iīmaï ante pönëninque cōwë godömenque nanguī tocæboimpa. ¹⁹ Minitō Wængonguī ingante botō beyæ nanguī apænemīni eñëninque Itota Codito Önōwoca pönō cæcæcäimpa, ante eñente tobopa. Ìninqe ñōwo botō caate wædō ante edæ iīncayæ ate ñimpo cædāni ate edæ botō abæ tawænte gote quëwenguinque edæ impa, ante do eñëninque tobopa. ²⁰ Botō wëenëñedë botō

cæbo bai ñowo adobai cæinëmo ïmopa. Ìntai ëñate miiimö quëwëmo incæ baonque wænönäni wæmo incæ, Mönö Codito ingante waa acedänimpa, ante cædinque botö cöwë guiñënämaï inte tæi ongöninque nanguï cædinque watapæ edæ bacæboimpa, ante pönëmopa. ²¹ Edæ inguipoga quëwëmo incæ botö Codito ingante entawëninque tömengä beyænque ante quëwëmopa. Wæætë wæmo incæ tömengä beyæ botö godömenque nanguï entawenguïmo ïmopa.

²² Incæte, Waiwæ nanguï incate bai botö cæquinque inguipoga ayæ quëwenguënëmo ïmopa, ante pönëninque botö, Æbänö anguïmoo, ante ëñencæte ante wæbopa. Edæ, Wæncæboimpa, ante anguënëmo ïmoo. Wæætë, Ayæ quëwencæboimpa, ante anguënëmo ïmoo. Edæ, Æbänö anguënëmo ïmoo, ante botö edæ ëñënämaï ïmopa. ²³ Edæ wada bæi ongonte æmataë töö æmataë töö godöna wæcä bai wädömo inte botö, Ædönö gämænö goquïmoo, ante wæbopa. Codito weca godömenque waëmö pönï quëwencæboimpa, ante botö wadæ goinëmo ïmopa. ²⁴ Incæte inguipoga quëwëninque minitö beyænque ante cæquënëmo inte botö ædö cæte wayömö goquïmoo. ²⁵ Ante pönente wædinque botö, Minitö mönö pönënö ante godömenque wede pönëninque watapæ tote quëwencæminimpa, ante cæquïmo ïmopa, ante ëñëmopa. Ayæ, Ñowo wænämaï inte botö minitö weca quëwenguïmo ïmopa, ante do ëñëmopa. ²⁶ Ìnque botö miiimo inte minitö weca pömo adinque minitö Itota Codito ingante waa adinque botö beyænque nanguï tocæminimpa.

²⁷ Codito ingantedö ante watapæ mönō ēñēnīnō beyæ ante mönō waa cæquēnēmō ïmompā, ante ēñēmīni inte mīnitō edæ waa cæte quēwēedāni. Mānōmaī cæmīni ïnīnque botō ōnōmoncaque ēñēmo incæ mīnitō weca ponte abo incæ, Pidipenteidi adoyōmō pōnēnīnque tæī ongōnānīpā, ante tededāni ēñēnīnque tobaīmopā. Ayæ, Codito ingantedö ante watapæ mönō ēñēnīnō ante wadāni ēñēcædānīmpā, ante pidipenteidi ïñacabo cædīnque nanguī cædānīpā, ante botō edæ ēñēnte tobaīmopā. ²⁸ Ayæ pīinte cædāni incæte mīnitō wæætē guññēnāmaī inte tæī ongōmīnīpā, ante adīnque botō tobaīmopā. Mīnitō mānōmaī guññēnāmaī inte tæī ongōmīni ate wædīnque nē pīinte ānāni wæætē, Mōnitō wænguinque impā, ante wæcædānīmpā. Nē pōnēmīni mīni quēwēnguinque impā, ante adīnque tōmēnāni godōmenque wæcædānīmpā. Edæ Wængonguī ængā beyænque quēwēncæmīnīmpā.

²⁹ Wængonguī waadete pōnō cæcā ate mīnitō Codito ingante wede pōnēmīnitawo. Edæ adocā pōnō cæcā ate mīnitō Codito beyænque cædīnque cōwē caate wæquīmīni ïmīnīpā. ³⁰ Pabodobo doyedē Codito beyæ ante wææ ancæte ante caate wætabopā, ante amīnitawo. Ñōwo godōmenque wææ cædīnque caate wæbopā, ante ōnōmoncaque ēñēmīnitawo. ïnīnque botō wææ ānīnque caate wæbo baī mīnitō adobaī botō tōnō godongāmæ wææ ānīnque caate wæmīni ïmīnīpā.

2

Codito ōnonganque bayongante Wængonguī da

æænongä

¹ Mönö Codito nempo quëwëninque mīnitō wampo pönēmīnitawo. Tömengä waadete pönengä beyænque gancæ pönēmīnitawo. Mönö Codito Önöwoca tönö äawocaque bai ëwocadinque godongämæ watapæ quëwëmīnitawo. Nē wæcä ingante godö waadete pönēmīnitawo. Adocanque wæwengä adinque mīnitō äanque bai wæwëninque tömengä beyæ cæmīnitawo. ² Mänömaï i ïninque adodonque pönëninque mīnitō waa waademīni adinque botö watapæ pönī tobaïmopa. Tömämīni äanque bai ëwocadinque, Mönö adoyömö cæcæïmpa, ante godongämæ cæmīni adinque botö godömenque nanguï watapæ tobaïmopa. ³ ïninque mīnitō nämanque ante pönëninque, Botö ïmote waa acædänimpa, ante cædämaï iedäni. Yæcado ongoncæboïmpa, ante cædämaï iedäni. Wæætë, Botö önömoque bai ïñömote wadäni wæætë waa pönī ïnänipa, ante pönëninque wadänique ïnänite ængö cæedäni. ⁴ Nämä mīni cæinënö ante cædinque mīnitō wīi mäninonque ante cædinque wæætë edæ wadäni nāni cæinënö adobai ante cæedäni.

⁵ Mänömaï cædinque mīnitō Itota Codito nänö pönengainö bai adodö ante pönëedäni.

⁶ Tömengä ïñömö cöwë näwä Wængonguï ïnongä ingampa. Incæte, Botö näwä Wængonguïmo ingaïmo inte

Mæmpo Wængonguï ganca botö ingainö ante ñimpo cædämaï incæboïmpa, ante tömengä änämaï ingacäïmpa.

⁷ Wæætë edæ, Mäninö botö ingainö incæ botö edæ ñimpo cæcæboïmpa, äninque wææ, önonganque bai bagacäïmpa.

Ayæ, Wængongui ingante nē cædōmo edæ
bacæboimpa, ante badingue wææ,
tōmengä waomō mōnō emōnō bai nānō
emonguinque waocä eñagacäimpa.

8 Mänōmai eñate pæte wææ tōmengä ononganque
inte bai cæyongä Wæmpocä,
Bitō wænguinō taadō gocæbiimpa, angä eñëninque
edæ Ao ante goyongante wææ,
tōmengä nānō guiñëñaquinque awæ ñænquedimæ
cæte māo timpodāni wææ tiwadāni ate
tōmengä caate wægōninque wææ bacaa edæ
wængacäimpa.

9 Mänōmai cæcä adinque Wængongui wæætē
tōmengä ingante æmonga pōni da
æænongacäimpa.

Ayæ wadāni emōwo onōwoque emōnāni bai tōmengä
Tæiyæ Awënë inongä inte wii adobai
onōwoque bai emoncæcäimpa, ante cædinque
Wængongui edæ, Itota Codito ingampa, ante
pōnō pemongacäimpa.

10 Edæ öönæde quëwënāni incæ inguipoga
quëwënāni incæ guimonga quëwënāni incæ
tömānāni edæ Itota emōwo eñente waa adinque
da guicapocädänimpa, ante Wængongui tōmengä
ingante pōnō pemongacäimpa.

11 Ayæ, Itota Codito ingante adinque tömānāni,
Mōnō Tæiyæ Awënë inongä ingampa, ante edæ Ao
ancædänimpa, ante Wæmpocä cægacäimpa.
Mänōmai cæcä adinque, Mæmpo Wængongui waa
pōni cæcampa, ante mōnō edæ watapæ
apænecäimpa.

Nëmoncoo äo äo cædote bai nöinō cæte quëwëedāni

12 Mänömaï beyæ botö nē waademini iñömīnite botö apænebo eñeedāni. Mīnitö weca botö quēwēnedē mīnitö do eñente cædimini inte ñöwo botö wayömö quēwēmo incæ godōmenque eñente cæmīni abopa. İninque cōwē mīni eñente cædinö baï adobaï cædinque ñöwo mönö watapæ quēwenguinö taadonque gocæte ante cædinque, Oda cæte wæcæ wæ, ante cōwā aquēnē quēwēmīni. 13 Wīi cæinente awædö, ante wæmīnitawo. Edæ Wængonguinque apæneca eñente entawēninque mīnitö tömengä waa pönī nänö änö ante nē eñente cæinēmīni bamīnīpa. Oda cæte awædö, ante wæmīnitawo. Adocä Wængonguinque mongæncadæ mongæncadæ cæcä ate tæi piñæmīni bate ate eyepæ cæmīnīpa.

14 İninque, Wīi cæinente awædö, ante änāmaï inte mīnitö piyænē cæte mīni cæquēnēnö ante do cæedāni. 15 Edæ mänömaï cæmīni adinque wadāni, Wentamö mongænāmaï imīnīpa, ante abainānīpa. Ayæ inguipogaque quēwēnāni eñēnāmaï inte idiquibæ pönente cæyönāni mīnitö wæætē Wængonguī wēñæmīni inömīni inte tömēnāni weca quēwēninque nēmoncoo äo äo cædote baï nöingä cæte quēwencæmīnīmpa. 16 Edæ, Codito pönö cæcä beyænque mönö quēwengæimpa, ante edonque apænemīni eñencædānīmpa. İninque, Doyedē botö apænedö ante mīnitö nē eñente cæmīnīpa, ante adinque botö nanguī todinque iīmaï ante pönēmopa. Mīnitö beyæ pæ pagænte cædōmo incæte botö wīi önonque cæboimpa. Wæætē mönö Codito nänö ponguïönæ iñonte botö, Mīnitö nö apænemīnitapa, ante adinque botö tocæboimpa. 17 Ayæ, Wængonguī quī, ante baö

godöninque waodäni baonga tepæ gao caadänipa. Minitö iñömö wede pönëmini inte, Wængonguï quï, ante nämä godö cæyömini botö quëwenguimämo incæ mïni godöincooga gao caate bai ba edæ waa tobaïmopa. Minitö tönö godongämæ edæ tobaimpa. ¹⁸ Minitö adobaï, Pabodo mönö beyæ cæcampa, ante tocæminipa. Edæ mönö edæ godongämæ tocæimpa.

Timoteo tönö Epapododito

¹⁹ Minitö æbänö quëwëminii, ante ëñëninque Timoteo wæætë apænecä ëñente tocæboimpa, ante cædinque botö, Itota Codito Ao angä ate Timoteo ingante oo da pönömo minitö weca poncæcäimpa, ante pönëmopa. ²⁰ Minitö æbänö quëwëminii, ante wæyömo tömengä adocanque minitö beyæ ante botö tönö guëa wæcampa. Wadäni guiquënë minitö beyæ ante wädämaï inänipa. ²¹ Tömänäni edæ nämä beyænque ante cæinente wædinque Itota Codito nänö änönö ante wïi cæinänäni inänipa. ²² Cöwä ayömini, Timoteo iñömö cöwë waa cæcampa, ante do ëñëmïnitapa. Ayæ mönö Codito ingantedö ante watapæ apænedinque Timoteo tönö möna wencaya bai guëa cæmönapa, ante do ëñëmïnitapa. ²³ Ìninqe, Botö imote awënëidi æbänö apænte anguïnänii, ante ëñente ate botö Timoteo ingante mäniñedë ate minitö weca do da pönömo poncæcäimpa, ante pönëmopa. ²⁴ Ayæ mönö Tæiyæ Awënë Ao angä ate tömëmo do pömaïmopa.

²⁵ Ayæ Epapododito mönö tönïñacä incæ botö tönö guëa cæmöna imönapa. Wadäni püinte cædäni adinque mönatö guëa wææ cæmönapa. Tömengä ingante minitö, Pabodo beyæ ante

godö cæcæbiimpa, ante do da pönömīni ponte cæcä æntabopa. Tömengä ingante ñowo wæætē adodö mīnitö weca edæ da pönömo ponguēnengä ingampa, ante pönēmopa. ²⁶ Adocä Epapododito iñömö mīnitö pidipenteidi imīnite acæte ante edæ nanguī wæcampa. Ayæ, Epapododito daicawo gawængampa, ante apænedāni ēñēnīnque pidipenteidi do wædānīpa, ante ēñēnte wædinque tömengä wæætē mīnitö beyæ ante nanguī wæwente bacampa. ²⁷ Nāwangä impa edæ. Tömengä daicawo gawænte wodo wængantapa. Incæte Wængonguī tömengä ingante waadete pönö gampocä waa bacantapa. Mänömaī cædinque Wængonguī botö beyæ adobaī ante pönēnīnque, Pabodo wīī godömenque wæcæcäimpa, ante pönengä inte edæ Epapododito ingante gampocä waa bacantapa.

²⁸ Mänömaī beyæ, Epapododito wæætē pongä adīnque tocæmīnīmpa, ante cædinque ayæ, Mīnitö tomīni adīnque botö wæwēnāmaī bacæboimpa, ante cædinque botö tömengä ingante ñowo da godoncæboimpa, ämopa. ²⁹ Pongä ate mīnitö, Mönö Awēnē nempo quēwēnōmi inte pöe, änīnque Epapododito ingante waa adīnque godongämæ watapæ tote cæedāni. Ayæ wadāni tömengä baī adobaī waa cædānīpa, ante adīnque tömēnāni inānīte waa adīnque waa cæedāni. ³⁰ Mīnitö, Pabodo beyæ ædö cæte cæquīmōnīi, ante, Gobæ awædö, ante wæyōmīnīte Epapododito iñömö edæ, Wæmo incæ cōwē cæcæboimpa, ante mīnitö cæquēnēnō ante cæcantapa. Codito beyæ ante cæcæte ante edæ tömengä wodo wængantapa cæmīnīi. Tömengä ingante edæ waa cæedāni, ämopa.

3

Tæi piñcente cæcæimpa, ante

¹ Ñowo iñömö botö töninãmïni eñeedäni. Mönö Awënë nempo quëwëninque mïni watapæ toquinque imïnipa. Minitö oda cædamaï incæminimpa, ante botö adodö adodö ante ancaa yewæmömo incæte wædamaï imopa.

² Iïmaï ämopa. Wadäni iñömö, Mönö eö togænte quëwengæimpa, ante nê änewënäni inte guintaidi bai wënæ wënæ cædinque nämä baö eö eö towënanipa. Ante adinque mïnitö tömënäni inänite gomö adinque wææ cædäni. ³ Edæ tömënäni inänite ee adinque Wængonguï mönö imonte wæætë pönö eö togænte bai cædinque mönö wentamö mongænö do wido cægacäimpa. Wængonguï Önöwoca ingante ænte ewocamö inömö inte mönonque edæ, Wængonguï ingampa, ante tömengä beyæ cæmompä. Itota Codito nempo quëwëmö inte mönonque wïi inguipoga beyænque quëwëmö imompä, ante mönö tömengä ingante waa ate apænemompä. ⁴ Tömënäni guiquënë inguipogaque ante pönëninque, Mönitö cædö beyænque quëwencæmönimpä, ante pönëwënanipa. Tömënäni nänï pönëwënö bai adobai pönente bai botö, Tömënäni wædænque cæyönäni botö godömenque nangui cædömo imopa, ante pönëwencædömoimpä. Edæ, Nanguï botö cædö beyænque quëwencæboimpä, ante pönëwencædömoimpä.

⁵ Edæ tömënäni nê eö togæinänï inänitawo. Botö iñömö adobai imopa. Tæcæ eñayömote önompo æmæmpoque go mëönaa go adoönæque

mānimpoönæ iñonte botō imote do eō togænāni wægaboimpa. Tömēnāni idægoidi inānitawo. Botō iñōmō idægo wodi pæimo inōmo inte tömengä nānōmocā Beencamīnō wodi pæimo inōmo imopa. Tömēnāni ebedeoidi inānitawo. Botō iñōmō ebedeobo eñagaimo inte nāwā ebedeobo inōmo imopa. Tömēnāni Paditeoidi inānitawogaa. Edæ botō Paditeobo inōmo inte Mōitee wodi nānō wææ angainō ante mōni Paditeocabo wædō ante tōmāā eñente cædōmo imoi aedāni. ⁶ Ayæ tömēnāni, Wængongui beyæ nanguī cæcæimpa, ante apænedānitawo. Edæ, Wængongui beyæ cæbote, ante edæ botō iñōmō doyedē Codito ingante nāni pōnengaincabo inānite ancaa togænte pancæte ante cægaboī aedāni. Ayæ oodeoidi guiquēnē, Mōnitō wææ angainō ante nē eñente cædānique nē nō cædāni inānīpa, ante änānitawo. Botō iñōmō edæ māninonque ante cōwē cædōmo inte wentamō mongænāmaī inōmo imopa.

⁷ Doyedē iñōmō botō mānōmaī godōmenque waa cædīmo inte, Botō toquinque waa pōnī cægaboimpa, ante pōnēwentabopa. Nōwo guiquēnē botō waa cægainō ante, Ōnonquedō ante cægaboī, ante do eñēmopa. ⁸ Ayæ wææ, Itota Codito botō Awēnē ingante adīmo inte botō tömengä ingante pōnēninque tömengä tōnō godōmenque waa pōnī quēwencæboimpa, ante botō, Wēēnēñedē botō entawengaincoo botō waa againcoo incæ edæ ēwenguincooque impa, ante pōnēmopa. Edæ Codito beyæ ante cæyōmo botō wēēnē mānincoo tōmancoo edæ dæ ba wætabopa. Īninque, Codito ingante godōmenque ēwocacæboimpa, ante nanguī cædinque botō, Wēēnē botō entawengainō ompotacoo bai

impa, ante wido cæbopa.

⁹ Edæ, Īmaī cæedāni, ante nāni wææ angainō ante ēñente cæbo incæte Wængonguī ayongante botō ædō cæte mǎnīnō beyænque nō entawēmo baquimoo. Wæætē Codito mōnō nē nō cædongā ingante wede pōnēmo inte tōmengā nempo quēwēñōmote Wængonguī pōnō badongā ate nō cæbo bacæboimpa, ante nanguī cæbopa.

¹⁰ Mōnō Codito ingante ate bai pōnencæboimpa, ante cæbopa. Ayæ tōmengā adocā nanguī tæī piñænīnque ñāni òmæmongacāimpa, ante wede pōnēnīnque botō mǎnīnō tōmengā nē ñāni òmæmongaingā nānō tæī piñænō bai adobai entawencæboimpa, ante cæbopa. Ayæ adobai, Tōmengā caate nānō wængai bai botō tōmengā beyæ wæncæboimpa, ante pōnēnīnque botō tōmengā tōnō godongāmæ caate wænte bai tōmengā nānō ēwocadō bai ēwocacæboimpa, ante cæbopa. ¹¹ Mǎnōmaī cædinque botō, Tōmengā wænte ate ñāni òmæmonte nānō quēwengai bai botō adobai wænte ate ñāni òmæmoncæboimpa, ante nanguī cæbopa.

Mǎnōmaī bacæboimpa, ante nanguī cæbopa, ante

¹² Mǎnōmainō ante apænedīnque botō, Codito nānō entawēnō bai do entawēmopa, ante dicæ apænebogaa. Picænāni bai do badīnque nō cædinque oda cædāmaī ĩmopa, ante dicæ apænebogaa. Incæte Itota Codito incæ edæ, Botō ēwocadō bai adobai ēwocacæbiimpa, ante botō ĩmote do bæi ongongacāimpa. Īnīnque botō wæætē, Tōmengā waa pōnī nānō ēwocadō bai adobai ēwocacæboimpa, ante bæi ongoncæte ante

nanguï cæbopa. ¹³ Ìñänäni ëñëedäni. Botö Codito nänö ewocadö ante dicæ eyepæ æmogaa, ante wæbopa. Incæte, Eyepæ ænämaï imopa, ante adinque wæwënämaï imopa. Wæætë, Ìncayæ ate Codito nänö ewocadö bai ædæmö ewocacæboimpa, ante cædinque botö mäninonque ante pönëninque pogodo gote bai cöwë cæbopa. ¹⁴ Wængonguï do, Bitö Itota Codito nempo quëwënömi inte eyepæ cædinque æmonga ponte æe, ante botö imote aa pegacäimpa. Ìninqe tömengä, Pædæ pönömo æncæbiimpa, ante nänö angaincoo ante ænte ewocacæte ante botö gänä cæcæte ante pogodo gote bai edæ nanguï cæbopa.

¹⁵ Mönö æmäwo picæmö badömö ìñömö tömämö adobainö ante pönenguënëmö imopa. Pancamïniya guiquënë mänömainö ante wïi pönëmini adinque Wængonguï, Minitö æbänö nö pönenguënëmini iminii, ante pönö odömongä ate ëñencæminimpa. ¹⁶ Mönö do ëñente quëwenganca mäninganca mönö cöwë nö cæte quëwengæimpa.

¹⁷ Ìñänäni ëñëedäni. Botö Pabodobo æbänö cæboo, ante adinque mïnitö botö cædö bai adobai godongämæ cæedäni. Ayæ, Mönitö cæmöni bai mïnitö adobai cæedäni, ante odömömöni bai pancadäniya adobai cædäni adinque mïnitö ìñömö, Adobai cæcæimpa, ante tömënäni inänite cöwä aedäni. ¹⁸ Minitö iminute wantæ wantæ ìñö wantæ wantæ ìñö apænedimo inte botö ñowo Ca ca wædinque adodö ante iïmaï ante godömenque apænebopa. Mönö Codito awäa wængä incæte nanguï inäni tömengä ingante Baa äninque tömengä nänö wængaiwæ ante piinte bai cædänipa, ante awædö. ¹⁹ Tömënäni nani ömæe ewente wæquinque

mänömaï cædänipa. Cænguï beyænque ante pönente quëwënanipa. Wënæ wënæ nāni cædö beyæ guingo imonte wæquënänāni incæ tōmënāni wæætë guïñëñadāmaï inte edæ, Waa pōni cæmōnipa, ante nāmā incæ waa adänipa. Edæ inguipoga beyænque ante cæinente wædänipa.

²⁰ Mönö iñömö mempoga ëñagaimö inte mönö öönædë ömæ do ëamö edæ imompa. Ìnque mönö Awënë Itota Codito, Quëwencæminimpa, ante nē Ængaingä ingante nanguï aïnente wædinque mönö, Tömengä æyedënö öönædë edæ wææ ponguingää, ante wänö cōmompā. ²¹ Tömengä iñömö tæï piñænongä inte tōmancoo edæ bæ tadinque ö æninque Tæiyæ Awënë incæcäimpa. Ìnque, Mönö quëwenguināmaï aquïñö ëñamompā, ante adinque tōmengä tæï piñænongä inte, Botö baö bai tæiñö mongæncæminimpa, ante badongä ëñaquimö imompa.

4

Mönö Awënë nempo quëwëninque watapæ toccëimpa

¹ Wængonguï botö imote poganta pönö wencate bai cædinque, Bitö waa apænebi ëñente beyænque pidipenteidi ëñente waa cædāni abopa, angä ëñëninque botö mīnitö beyæ ante watapæ tobopa. Mīnitö imīnite ædæmō waadedinque botö, Æyedënö bee tenguimoo, ante wæbopa. Ìnque botö nē waademini ämo ëñëedāni. Māninö botö äninö ëñente cædinque mīnitö mönö Awënë nempo quëwëninque tæï ongödāni.

² Ñöwo Eodia, Tintique, mīna onquiyæncaya ĩmĩnate ämo ëñēeda. Mönö Awënë nempo quëwëninque mĩnatö piyænë cæte adodonce ante cæbæweda, ämopa. ³ Botö mönö Awënë ingantedö ante watapæ apænecæte ante nanguĩ cæyömote Codëmente tönö wadäni botö tönö ĩñacabo cædänitapa. Wængonguĩ, Nāni quëwenguĩta, ante tömengä nänö yewæmongaintaa tömënāni ëmowo dobæ yewæmonte mæ õñompa. Tömënāni botö tönö cæyönāni ĩina onquiyæna Eodia tönö Tintique ĩñömö botö tönö adobaĩ ĩñacabo nanguĩ cæda ĩnatapa. ĩnĩnque bitö cöwë botö tönö guëa cædömi ĩñömite bitö ĩmite ämopa. ĩina ĩnate bitö waadete apænebi ëñëninque piyænë cæte quëwencædaĩmpa.

⁴ Ayæ tömämĩni ĩmĩnite, Mönö Awënë nempo quëwëninque watapæ tote quëwëedäni, ämopa. Edæ, Watapæ pönĩ tote quëwëedäni, ante adodö ante ämo ëñëedäni. ⁵ Mönö Awënë edæ oo pönĩ poncæcäĩmpa cæmĩnii. Ee ædæmö cæte quëwëñömĩni tömänāni waadete mĩni cædönö ante edonce acædänĩmpa.

⁶ Ayæ, Quiëmë bacæ wæ, ante mĩni wædö ante guĩñente wædämaĩ ĩedäni. Wængonguinque ingante apæneedäni. Apænedĩnque, Wængonguĩ, bitö pönö cæbi ate eyepæ ĩnte quëwencæmönĩmpa, ante quiëmë mĩni æncæ wædö incæ ante apænecæmĩnĩmpa. Ayæ tömengä pönö cæcä adĩnque mĩnitö, Bitö pönö cæbi waa æmönĩpa, ante Wængonguĩ ingante wæætë waa ate pönente apæneedäni. ⁷ Ayæ, Wængonguĩ piyænë cædĩnque pönö aacä beyæ mĩnitö Itota Codito nempo quëwëninque piyænë cædĩnque mĩmönë wædämaĩ ĩnte nö pönëninque quëwencæmĩnĩmpa. Edæ

mönö, Æbämē cæte Wængongui pönö piyænē cæte aacää, ante mönö waocabo eñenāmaī imö incæte tōmengä cōwē godōmenque aacä ate wædāmaī inte quēwēmōmpa.

Quinö waa i, ante mäninonque ante pönēē cōedāni, ante

⁸ Īñānāni eñēedāni. Minitō æbānō ante pönēē conguēnēmīni imīnīpa, ante yewæmōninque botō ñōwo æmæwo pōni yewæmōmoī aedāni. Nāwangä nāni apænedō ante pönēē cōedāni. Æbānō waa cæquīī, æbānō nō cæquīī, ante pönēē cōedāni. Quiēnō nō i, ante mäninō ante pönēē cōedāni. Mönö æbānō waadete pönenguīī, ante pönēninque mönö waa adoncoo ante adobaī pönēē cōedāni. Wadāni waa nāni cædīnō ante pönēē cōedāni. Mänōmaī cædāni ate wadāni waa adānitawo. Īninque tōmēnāni nāni waa adīnō ante mīnitō mäninō ante pönēē cōedāni. Īninque, Quiēmē waa pōni i, ante adinque mäninonque ante pönēē cōedāni.

⁹ Botō odōmonte apænebo eñēmīnitawo. Īninque botō pönö apænebo eñēninque mīni eñēnīnō baī tōmānō ante edæ cæedāni. Botō pædæ pönōmo æmīnitawo. Īninque botō pædæ pönōmo mīni ænīnō incæ ee māedāni. Botō entawēnō ante, Æbānō entawēmoo, ante edonque amīnitawo. Īninque botō entawēnō mīni adīnō baī mīnitō adobaī entawēninque edæ waa cæedāni. Mänōmaī cæmīni adinque Wængongui nē gānē pönēnongä inte mīnitō tōnō godongāmæ quēwēninque pönö cæcä ate mīnitō wæætē gānē pönēmīni bacæmīnīmpa.

Pidipenteidi mīni pōnōnī waa æntabopa, Pabodo angampa

¹⁰ Botō wædō ante mīnitō doyedē pōnō cædīmīni inte ñōwo wæætē tæcæ pōnente wædinque wæætē pōnō cæmīni ænīnque botō, Mōnō Awēnē beyænque pōnō cæmīnīpa, ante adīnque nanguī waa tobopa. Edæ botō wædō ante cōwē waadete pōnēmīni incæte mīnitō da pōnoncæ cæyōmīnite wææ cæte ī æīquedō da pōnonguīmīnī. ¹¹ Incæte mănōmaī apænedīnque botō wīī ænguēnēmo inte apænetabopa. Edæ wædænque ēabo incæ nanguī ēabo incæ quīēmē ēabo incæ botō, Æbānō quēwenguīī, ante do ēñēmo inte edæ piyænē cæte wædāmaī cōwē quēwēmopa. ¹² Ōmæpobo wædīmo inte botō, Ōmaadāni æbānō quēwēnānīī, ante do ēñēmopa. Adobaī nanguī ēate quēwēnīmo inte botō, Nanguī ēadāni æbānō quēwēnānīī, ante do ēñēmopa. Edæ tōmo cæmo incæ, gæwænte wæbo incæ, nanguī ēabo incæ, ōmæpobo incæ mănīnō tōmānō ante wægāīmo inte botō mănōmaī ingāīmo beyænque ēñente batabopa. Īnīnque æyōmōmē quēwēmo incæ quīēmē baī quēwēmo incæ piyænē cæte wædāmaī quēwēmopa. ¹³ Edæ quīēmē beyæ wæbo incæ mōnō Codito pōnō cæcā ate botō wæætē edæ eyepæ entawēnīnque tōmāā edæ cæbopa.

¹⁴ Incæte botō ōmæpobo inte wæyōmote mīnitō pōnō cæmīni waa æntabopa. ¹⁵ Ayæ adobaī mōnō Codito ingantedō ante watapæ mōni apænedō ante tæcæ ēñēmīni ate botō Māatedōniabæ īnīnque apænedīnque wadæ goyōmote wadāni Codito ingante nāni godongāmæ pōnencabo pōnōnāmaī īñōnānīte mīnitō adomīnīque da

pönömīni æntabopa, ante mīnitō pidipenteidi do ēñēmīnīpa. ¹⁶ Edæ, Tetadōnica nāni quēwēñōmō quēwēnīnque Pabodo ōmæpocā bacampa, ante tededāni ēñente wædīnque mīnitō wīī adopoque wæætē wæætē da pönömīni æntabopa.

¹⁷ Botō dicæ botō æncæ wædō ante apænetabopa. Wæætē, Pidipenteidi wadāni īnānite nē godōnāni īnānīpa, ante adīnque Wængonguī wæætē mīnitō īmīnite godōmenque pōnongā æncæmīnīpa, ante apænetabopa.

¹⁸ Īnīnque botō īñōmō idæwaa æntabopa. Botō ænguēnēnō ænīnque godōmenque nangūī ænte ēabopa. Edæ, Pabodo quī, ante mīni da pönōnīncoo Epapododito wæætē botō īmote pædæ pōnongā ænīnque botō eyepæ pōnī ēate quēwēmopa. Mīnitō, Wængonguī quī, ante oguī waquī baī pönō iya tante baī cædīnque, Pabodo quī, ante da pönömīni adīnque, Waa pōnī pönömīnīpa, ante Wængonguī incæ waa acampa. ¹⁹ Botō Wængonguī ñāō baī entawēnīnque tæī ēmongā īnongā inte tōmengā nānō ēadoncoo īñōmō edæ bacoo pōnī ongompa. Īnīnque, Mīnitō ænguēnēmīni īmīnīpa, ante adīnque tōmengā Itota Codito beyænque cædīnque eyepæ pōnī edæ da pōnongā æncæmīnīpa.

²⁰ Mōnō Wængonguī mōnō Mæmpo īñongante, Bitō waēmō pōnī īnōmi īmīpa, ante mōnō cōwē watapæ apænecæīmpa. Edæ ñōwopāmo incæ mīīmāmo incæ mōnō cōwē mānōmaī apænecæīmpa. Mānōmaī impa, ānīnque botō, Amēē, āmopa.

Mānīnque ante yewcēmōmopa, ante

21 Wængonguī quīnāni Itota Codito nempo quēwēnōnāni iñōnānite mīnitō, Waa quēwencæmīnīmpa, ante botō beyæ ancæmīnīmpa. Ayæ botō tōnō godongāmæ ongōnāni incæ, Mīnitō æbānō quēwēmīnīi, ante wædānīpa. 22 Edæ Tæiyæ Awēnē Tetædo oncōnē quēwēnāni tōnō wadāni Odōmä iñōmō wayōmō quēwēnāni tōnō Wængonguī quīnāni incæ tōmānāni adobaī mīnitō imīnite, Waa quēwencæmīnīmpa, ānānīpa.

23 Mōnō Awēnē Itota Codito mīnitō imīnite waadete pōnō cæcæcāīmpa, āmopa. Mānīnque ante yewæmōmopa.

Wængonguī nānō Apænegainō
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

9bedab5a-39ff-5163-a35b-8056cbbe8690